

JAUNATIS DARŽI NUŠVĖTA

BLIŪDŽIUVIENĖ Regina

Vakar daržų pasakiau:
– Rītuo kelkities unksčiau.
Lapukus rasuo nuprauskit,
Vuortinklius visus nubraukit.
Gražė līsviesi tupiekit,
Vīns i kėta paveiziekit,
Ka nabūtu kas suvītis
A nu piktžuoliu sunīkis.

Jie šlamiesit, tā tik skombė.
Jie žīdiesit, tā tik stombė.
Vėsas daržas ka kvepietu.
Kuožnas, kas tik paveizietu,
Tuoki darža pavīdietu,
Pats auginti prižadietu.
Vuo rītuo čia būs svečiū.
Nasakīsu aš, kuokiū.

Daržu aš pasitiekėjau.
Jau senė anam žadieju,
Ka sulauks uns brongi sveti.
Čiesas ī anam atėti.
I atēt, i pasilėkti.
Tegu ruošas pasitėkti.

.....

Jauns mienolis mienolioks,
Švīsus dungaus kumelioks,
Vakara žaruo blizgieji.

Ruods, puo pīva šuokinieji.
Saulis spindulius vajuoji
I žvaigždikiems duovenuoji.

Tuos iš maluonoma marksties,
Vis aukščiau i dongu karsties.
Tujau vėsas dungaus skliauts
Sužibieji kap nuplauts.

Žemie rasas atsimerki,
Vuo i darža isismelkis
Mīgs, ramībīs prisipėldis,
Visus šnabždesius nutėldis,
Sava išskleidi apsiausta,
I visi pradieji snausti.

Vuo káp žaras apsisoka,
Vuos nu smaiga nanusmoka
Nuo rasuos gal kīk sumėrkis
I nu mīga dā apgėrtis,
Pabundīk atspėt' – gi žėrnīs!

Gal tikrā i būt nuvėrtis,
Ali ūsas susiraitis
Tāp gerā anon prilaiki,
Ka tas virš vaguos lingava,
Markstiesi i plevėsava.

Mona žuodžius atsimėnis,
Daržas bova sunerėmis.
I agorks, pakielis lapa,
Susirūpinis tāj saka:

– Kaiži káp tas svets atės?
Gal iš dongaus nusilės?
Nasenė juk matiem vieji,
Kāp rugius uns sukinieji.
Vuolus rėtina par lauka.
Ruods, rugiūs valtėkis plauka.
Pasiruodīs gal kap vies
I kap rugius sukinies.

Susirūpina cibolis.
– Tu, agorkā, atsigolis.
Tavis tikrā napakels
I lapoku nasuvels.
Agorkioku naišmietīs,
Narėks kibītīs už avietīs.

– Tik, ciboli, nadejūk
I už vieji naužkliūk.
Kiaurā par tavi pralieks,
Tava lapu nasutriešk.
Pikčiaus darži nieks nalauks.
Pamatīsīt, čia būs draugs.

– Tabūnī, káp tu sakā.
Juk i viejū mas draugā.
Linksmas uns i jauns, i lonkstus
Mūsū darži tonkē lonkuos.
I mas patīs kap vākā
Plazdam su anūm linksmā.

I pupėki žemgulėki
Kilstelieji viršūnėki:
– Aš dā tik pradiejau augti,
Tā tikrā galiu sulaukti,
Jie tas pažadiets svetīs
Pavielavis čia užklīs.

Vuo didžiuoji pupa markstuos –
Anuos žīdi bėti vartuos.
Jie atlieks dā dvi a trīs,
Pupa ūš jau kap aulīs.
Tas, i darža kor atės,
Atriepliuos a nusilės,

(Nukelta i 72 p.)



Bītautis Žanetas portigrapijī



Anon tikrā aplonkīs,
I išgērs, i pamatīs.

Diel tuo pupa i tīlieji.
Klausies, kon kiti šnekieji.

Runkulīs vaguo tupieji –
Atsibosti gal naspieji? –
Kuoc nažid uns i nie kvep,
Nie medom kap popas tep,
Ali darži anū daug,
I aukščiau už muorkas aug.
Tā dabā ī ruoda dedas
I kap sau, kap daržū saka:

– Mas i bruolē sietinē
Lapus išmetam platē.
Tas, katras rītuo atēs,
Anū kilimukās ēs.
Puo didžiausi sava lapa
Paguldīsmā pri pat taka.

Kuol muorkēki vis tīlieji,
Agūnēki prisidieji:

– Dā nadaug turu židū,
Ali nubarstīt žadu,
Kor ketina runkulīs
I stuorolis sietinīs
Sava lapus suguldīti.
A galieciō tāt darīti?

Baisē nuoru prisidieti
I ton sveti pamīlieti.

Pralieki virš darža paukštis.
Bolbi vielek isibaugšti.
Na visā dā atsibodus
I pusiaumīga sujodus,
Misliji, ka vabalā –
Tī drīžoti padarā –
Atlieki anuos nuskriausti
I pripūlin pradies graužti.

Daržas svarsti šīp i tāt.
Tā pritars, tā viel kitāt.
Ka nablēka kuo baklausti,
Nutari tiktā palaukti.
Nieks daugiau napasakīs.
Patis viskon pamatīs.

.....
Sauli kēla vis aukščiau.
Aš i darža atejau –
Na vīna, al' svēti brongu,
Prilaikīdama už ronku,
Atlīdiejau kap i suosta.
Pakšteliejus dā i skruosta,
Vēsa darža patikiejau.
Tik gilē atsidūksiejau.

Seni augalā nunīkst,
Jauni anū vītuo dīgst.
Tāt padongie puo delčiuos



Jaunoji daržininki – močiutis pagalbininki

Jauns mienolis tujau stuos.
I spindies uns, i pilnies,
Žemie švīsuos vis daugies.

Mona vīstonti šakēki
Jauna parjam jau ronkēki.
Su daržu ana draugaus,
Līsvīs sauguos i naskriaus.
Daržas visumet žaliūs,
I delčiuos anam nabūs.

Jauns kitāt gal dērbt išmuokis,
Gal daržuovis augs kituokis.
I munuoji talkininki
Bondi arbūzus auginti,
Al' ba darža pri numū
Kap šeimīna ba vakū.

.....
Jūs, mergēkis i vaikiukā,
Būkit darži mienuliukā.
Napabiekit, naišnīkit,
Tik atēkit, pasilēkit.

Jaunas ronkas darbininkis
Būs daržuoviems talkininkis,
Vuo kinkiejams baisininkis.

Jie daržā kap rūtas žels,
Pasakas čia prisikels.
Jūs matīsīt i girdiesīt,
Dā kitīms apsakiniesīt.



Tokī arbūzā išaug poetis Bliūdžiuvienis Reginas darži

Portigrapijis iš autoris albuma